

Morning Dogri (NSD) National News Bulletin 31-10-2024

आकाशवाणी

खबरां जितेन्द्र सिंह कोला।

1. राष्ट्र अज्ज वल्लभ भाई पटेल हुंदी जयंति दे मौके पर राष्ट्रीय एकता दिवस मना करदा ऐ।
2. केन्द्रीय कर्मचारिएं ते पैंशनरें लेई बाद्दू 3 फीसदी डीए ते डीआर दी घोशणा कीती गई ऐ।
3. प्रधानमंत्री नरेन्द्र मोदी होरें लोकें गी देयाली दी मुबारकबाद दित्ती ऐ।
4. वन वर्ल्ड ट्रेड सेंटर गी देयाली दे मौके पर शैल सनाकड़े ढंगे कन्नै सजाया गेदा ऐ ते द्वीप माला कीती गेदी ऐ।
- 5 मानसी इलावत नै विश्व कुश्मी प्रतियोगिता च 59 किलो भार वर्ग च कैह दा तगमा जित्तेआ ऐ।

<><><><><><>

President

राष्ट्र अज्ज वल्लभ भाई पटेल हुंदी जयंति राष्ट्रीय एकता दिवस दे तौर मना करदा ऐ। राष्ट्रपति द्रौपदी मुर्मू होरें अज्ज बडलै पटेल चौक च सरदार वल्लभ भाई पटेल होरें गी श्रद्धांजलि भेंट कीती। उपराष्ट्रपति जगदीप धनखड़ होरें बी सरदार वल्लभ भाई पटेल होरें गी श्रद्धांजलि भेंट कीती। राष्ट्र सरदार पटेल हुंदी जयंति गी राष्ट्रीय एकता दिवस दे तौर मना करदा ऐ। उंदी जयंति हर बरे 31 अक्तूबर गी मनाई जंदी ऐ। सरदार पटेल होरें भारत दी आजादी दी लड़ाई च अहम भूमका नभाई ही। ओह आजाद भारत दे पैहले उप-प्रधानमंत्री ते गृहमंत्री रेह। राष्ट्रीय एकता दिवस बक्ख-बक्ख रजवाड़ें दे किट्ठा होइयै भारत दी कोशशें गी चेता नुआंदा ऐ।

<><><><><><>

PM Akta Diwas

प्रधानमंत्री नरेन्द्र मोदी होरें सरदार पटेल हुंदी जयंति दे मौके पर आयोजित राष्ट्रीय एकता दिवस कार्यक्रम च शामिल होंगन। ओह एकता दिवस च सरदार पटेल हुंदी प्रतिमा पर पुष्पांजलि भेंट करगंन ते एकता दिवस सगंध चुक्कगंन। प्रधानमंत्री एकता दिवस च परेड बी दिक्खगंन। इस परेड च 9 राज्यें, 1 केन्द्री राज प्रबंधन ते 4 केन्द्रीय सशस्त्र बलें सनें कुल टीमां हिस्सा लैरदियां न।

<><><><><><>

DA

पेंशनरें दी भ्लाई बेह्तरी सरबंधी मैहकमे नै केन्द्रीय कर्मचारिएं ते पेंशनरें दे हित्ते च इक जुलाई थमां डी.ए दी किश्त जारी करने दी घोषण्ण कीती ऐ। केन्द्र मंत्रीमंडल नै 3 फीसदी डी.ए दी किश्त गी मंजूरी दित्ती ऐ। केन्द्र सरकार दे पेंशनर ते परिवारक फंड पेंशन लैने आले पेंशनरें गी हुन 50 फीसदी दी थाहर 53 फीसदी डी.ए थ्होग।

<><><><><><>

Maharashtra Election

महाराष्ट्र च 288 सीटें उप्पर होआ'रदी असैंबली चुनाएं लेई नमांकन पत्रें दी जांच पड़ताल मगरा 7 ज्हार 50 मेदवार चुनावी मैदान च रेई गे न। 917 मेदवारें दे नामांकन सपूरे नेई होने कारण रद्द करी दित्ते गे। नानदेड लोकसभा सीट लेई होआ'रदे उप-चुनाएं लेई नामांकन पत्रें दे जांच पड़ताल मगरा 22एं मेदवारें दे कागज वैद्य पाए गे। मेदवार संगारै 4 नवम्बर तोड़ी अपना नां वापस लेई सकदे न। राज्य च मतदान 20 नवम्बर गी होग जदके वोटें दी गिनतरी 23 नवम्बर गी कीती जाग।

<><><><><><>

Jharkand

झारखंड च होआ'रदे असैंबली चुनाएं तैहत दुए गेड़ लेई नामांकन वापस लैने दा खीरी ध्याड़ा। इस गेड़ तैहत 643 मेदवार चुनां लड़ा'रदे न। इस गेड़ च 20 नवम्बर गी 38 विधानसभा सीटें लेई वोट पाए जांगन जदके पैहले गेड़ तैहत 43 विधानसभा सीटें पर 13 नवम्बर गी वोट पुआए जांगन। वोटें दी गिपतरी 23 नवम्बर गी होग।

<><><><><><>

Bihar

बिहार च तरारी, इमामगंज, बेलागंज ते रामगढ़ विधानसभा सीटें लेई होने आले उपचुनां लेई 38 मेदवार चुनां मैदान च रेई गे न। नामांकन पत्र वापस लैने दे खीरी ध्याड़े 44 चा 6 मेदवारें अपने नां वापस लेई लैते। बेलागंज चुनां हल्के च सारे शा मते 14 मेदवार चुनां मैदान च न जदके तरारी चुनां हल्के च 10, इमामगंज च 9 मेदवार चुनावी मैदान च रेई गे न।

<><><><><><>

PM-Diwali

प्रधानमंत्री नरेन्द्र मोदी होरें देशवासिएं गी देयाली दी मुबारकबाद दित्तियां न। इक सोशल मीडिया पोस्ट च श्री मांदी होरें आखेआ जे देयाली दा ध्यार सब्बने देशवासिएं दे जीवन च खुशियां, सेहत ते तरक्की आन्नै। उनें कामना कीती जे जे सब्बनें जनें गी मां लक्ष्मी ते भगवान गणेश हुंदा आशींवाद प्राप्त होए।

<><><><><><>

UP-Diwali

देयाली दा ध्यार उत्तर प्रदेश च पूरी धार्मिक श्रद्धा ते भावना कन्नै मनाया जा'रदा ऐ। कल अयोध्या च सरियू नदी कंडे दीप-उत्सव मनाया गेआ। इस मौके पर केन्द्री संस्कृति मंत्री गजेन्द्र सिंह शेखावत, राज्य दे मुखमन्त्री योगी अदित्यनाथ ते होर दुए गनमान्य व्यक्तिए सने ज्हारा बद्धे श्रद्धालु मजूद हे। इस मौके पर बोलदे होई मुखमन्त्री योगी आदित्यनाथ होरें आखेआ जे बड़ा खास ऐ जे 22 जनवरी गी 500 ब'रे दे इंतजार मगरा भगवान राम अपने नमें मंदर च आए न।

<><><><><><>

SCR Trains

दक्खन केन्द्री रेलवे नै देयाली ते छठ पूजा दे मौके पर बाद्धू यात्रिएं दा प्रबंधन करने लेई साढ़े 8 सौ विशेष रेलगड्डियां चलाइयां न। एससीआर दे एहलकारें घोषणा कीती जे इस ध्यारै आली रूतै बाद्धू मुसाफरें गी सुविधा देने लेई विशेष रेलगड्डिएं दा सरिस्ता कीता ऐ। इक विज्ञप्ति च जानकारी दित्ती गई जे बाद्धू मुसाफरें दी सुगम यात्रा लेई इंतजाम करने आस्तै सिकंदराबाद, हैदराबाद, विजयवाड़ा ते तिरुपति थमां विशेष रेलगड्डियां चलाइयां जा'रदियां न। एहदे इलावा मजूदा रेलगड्डिएं च बाद्धू डिब्बे बी लाए गे न।

<><><><><><>

Diwali Newyork

न्यूयार्क च स्थित वन वर्ल्ड ट्रेड सेंटर गी जेहड़ी अमरीका च मजूद सारें चा उच्ची ईमारत ऐ देयाली दे मौके उप्पर बड़े ग शैल सनाकड़ै कन्नै सजाया गेदा ऐ। अमरीका आस्सेआ देयाली दा ध्यार मनाने दी घोषणा मगरा वन वर्ल्ड ट्रेड सेंटर गी दीए कन्नै सजाया गेदा ऐ। इक सोशल मीडिया पोस्ट च न्यूयार्क च भारत जनरल कौंसल होरें आखेआ जे देयाली दा ध्यार हुन पूरे विश्व मनाया जा'रदा ऐ। देयाली दे मौके पर न्यूयार्क च पैहली नवम्बर गी बंद रौंहगन।

<><><><><><>

Delhi Pollution

दिल्ली च ब्हाऊ दी गुणवत्ता च होर गिरावट दर्ज कीती गई ऐ। दिल्ली दे केन्द्री प्रदूषण नियंत्रण बोर्ड मूजब ब्हाऊउ दी गुणवत्ता अज्ज बडलै 326 दर्ज कीती गई। मौसम विभाग नै पेशनगोई कीती ऐ जे कल्लै तोड़ी ब्हाऊ दी गुणवत्ता च होर गिरावट होई सकदी ऐ ते एह वैरी पूअर श्रेणी दे स्तर तोड़ी पुज्जी सकदी ऐ। मौसम विभाग नै आखेआ जे पटाखे कारण ब्हाऊ दी गुणवत्ता च होर गिरावट आई सकदी ऐ।

<><><><><><>

Wrestling

टलबानिया च खेड्डी जा'रदी अंडर-23 विश्व कुश्मी प्रतियोगिता च भारत दी मानसी अलावत नै महिलाएं दे 59 किलोग्राम वर्ग च कैंह दा तगमा जित्तेआ ऐ। मानसी नै क्वार्टर फाइनल च सलोमिया विंक गी 4-0 कन्नै हराया।

<><><><><><>